

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03 i 76/09), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05), čl. 16. i 38. Pravilnika o licencama ("Službeni glasnik BiH", broj 38/05) i Odluke o uspostavi pojednostavljene procedure izdavanja licence za međunarodnu trgovinu za podnosioca zahtjeva u statusu kvalificiranog kupca ("Službeni glasnik BiH", br. 75/06 i 101/08), Državna regulatorna komisija za električnu energiju, na sjednici održanoj 24. novembra 2009. godine, donijela je

ODLUKU

O IZDAVANJU LICENCE ZA DJELATNOST MEĐUNARODNE TRGOVINE – UVOZA ELEKTRIČNE ENERGIJE ZA VLASTITE POTREBE

1. Izdaje se licenca Društvu "B.S.I." d.o.o. Jajce za obavljanje djelatnosti međunarodne trgovine - uvoza električne energije za vlastite potrebe, kao podnosiocu zahtjeva u statusu kvalificiranog kupca neposredno spojenog na prijenosnu mrežu.
2. Licenca iz tačke 1. ove odluke izdaje se za period od 1. januara 2010. godine do 31. decembra 2014. godine.
3. Sastavni dio licence su Uvjeti za korištenje licence za obavljanje djelatnosti međunarodne trgovine – uvoza električne energije za vlastite potrebe.
4. Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

"B.S.I." d.o.o. Jajce (u daljem tekstu: podnosilac zahtjeva) podnio je Državnoj regulatornoj komisiji za električnu energiju (u daljem tekstu: DERK) zahtjev broj: Ip-117/09 od 21. jula 2009. godine za izdavanje licence za obavljanje djelatnosti međunarodne trgovine – uvoza električne energije za vlastite potrebe, kao kupac koji ima status kvalificiranog kupca, a neposredno je spojen na prijenosnu mrežu.

Podnosilac zahtjeva je vlasnik početne, odnosno privremene licence za obavljanje djelatnosti međunarodne trgovine, upisane u Registar licenci kod ove Komisije pod registracijskim brojem: 05-28-124-26/07 od 27. decembra 2007. godine, čije trajanje ističe 31. decembra 2009. godine. Shodno članu 38. Pravilnika o licencama ("Službeni glasnik BiH", broj 38/05), ne kasnije od 180 dana prije isteka privremene licence ili od roka koji DERK propiše posebnom odlukom, vlasnik licence je u obavezi podnijeti zahtjev za izdavanje nove licence. O ovom zahtjevu odlučuje se u skladu sa internim pravilima i propisima DERK-a i shodno članu 7. Zakona o prijenosu, regulatoru i operatoru sistema električne enegije u Bosni i Hercegovini ("Službeni glasnik BiH", br. 7/02, 13/03 i 76/09).

Zahtjev je podnjet blagovremeno, na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnijeti uz zahtjev ili predočeni naknadno na zahtjev DERK-a, omogućili DERK-u da razumije, razmotri i odluči o podnijetom zahtjevu. U ovom smislu, u skladu sa članom 8. stav 2. Pravilnika o licencama, DERK je obavijestio podnosioca zahtjeva svojim aktom broj: 05-28-248-6/09 od 7. oktobra 2009. godine.

Po pregledu i provjeri svih formalnih elemenata zahtjeva DERK je najprije, u skladu sa obavezom iz člana 10. Pravilnika o licencama, 10. oktobra 2009. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu

i odredio rok do 24. oktobra 2009. godine za dostavljanje komentara javnosti na podnijeti zahtjev za izdavanje licence.

DERK konstatira da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješača.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom – uvoz električne energije za vlastite potrebe. U toku prethodne dvije godine korištenja privremene licence podnosilac zahtjeva je potvrđivao svoju sposobnost da ovu djelatnost obavlja u skladu sa Zakonom o prijenosu, regulatoru i operatoru sistema električne energije u BiH i pravilima i standardima kojih se kao učesnik na tržištu električne energije u obavezi pridržavati.

Nadzor svih aspekata usklađenosti djelovanja podnosioca zahtjeva sa uvjetima početne odnosno privremene licence u toku njene primjene, pružio je dokaze DERK-u da može pristupiti pripremi početne verzije Uvjeta za korištenje nove licence za obavljanje djelatnosti međunarodne trgovine koja bi važila pet godina. Ovaj dokument je od 2. novembra 2009. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj raspravi obavljenoj 11. novembra 2009. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako su na održanoj općoj raspravi izostali bilo čiji komentari koji su mogli utjecati da neki od uvjeta za korištenje licence budu uređeni na drugačiji način, pripremljen je prijedlog da se zatražena licenca izda i dostavljen podnosiocu zahtjeva aktom DERK-a, broj: 05-28-246-19/08 od 12. novembra 2009. godine. Ni u ostavljenom roku do 20. novembra 2009. godine, podnosilac zahtjeva nije istakao bilo kakav komentar pa je bilo osnovano zaključiti da prijedlog smatra sačinjenim u skladu sa Zakonom o prijenosu, regulatoru i operatoru sistema električne enegije u Bosni i Hercegovini i podzakonskim propisima koji reguliraju predmetnu materiju.

S obzirom na uvjerljivost pokazatelja o finansijskom integritetu i stabilnosti, organiziranosti i resursima podnosioca zahtjeva sa kojima bi nastavio obavljati licenciranu djelatnost, njegov neizmijenjen status kvalificiranog kupca električne energije, odobren rješenjem Regulatorne komisije za električnu energiju u Federaciji Bosne i Hercegovine, broj: 07-02-791-06/17/06 od 3. oktobra 2006. godine, kao i izvjesnost ovog potrošača direktno priključenog na prijenosnu mrežu da vlastite potrebe i dalje zadovoljava uvozom električne energije, DERK je odlučio kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: 05-28-248-21/09
24. novembra 2009. godine

Tuzla

Predsjedavajući Komisije

mr Vladimir Dokić